



4. april 2019

UPA2019/227

Inatsisartut Suleriaasianni § 36 naapertorlugu apeqquteqaat aallaavigalugu oqallisissiaq imaattoq matumuuna saqqummiuppara:

Ataatsimoorluta pisuussutitta uuliap, atortussiassaattita, imiutitta nukissiutittalu qanoq iliorluta sakkortunerusumik pilerisaarutigisinnaanerigut pillugu apeqquteqaat allaavigalugu oqallinnissamik siunnersuut.

(Inatsisartunut ilaasortaq Randi Vestergaard Evaldsen, Demokraatit)

Tungavilersuut

Namminersorlutik Oqartussani atorfillit niuertuusaassappat? Tamanna tusarnerpallaanngilaq. Taamatulli pisoqartarpoq - aamma (ajoraluartumik) naliginnaavoq. Naalakkersuisoqarfiit arlallit soorlu takutitsinersuarnut aamma niuerneq siuarsarniarlugu nunarsuup sinnerani sumiiffinni assigiinngitsuni peqataasarput, tamakkunanilu tamatta pisuussutigut soorlu uulia, atortussiassaattigut, imeq nukissiuutillu tuniniartarpaat. Piffissarli tamakkununnga atorneqartarsimasoq kingumut qiviarutsigu malunnaqaaq iluatsitsisoqarpallaartarsimangitsoq aamma aap, iluatsitsinerit assammi ataatsimi inukkanit ikinnerupput. Perruualaarutissanngilaq - ukiuni qulikkaani taama amerlatigisuni misiliisoqartarsimagaluarnera eqqarsaatigissagaanni.

Piffissanngorpoq nutaamik eqqarsalernissarput. Sukkassuseq allanngortittariaqarpoq. Tassunga atatillugu Demokraatini siunnersuutigerusupparput piffissanngortoq suliap namminersorlutik inuutissarsiortunut isanneqarnissaanut taakku pisariaqartinneqartunik piginnaaneqarmata inuiaqatigiit suliassaataannut taamaattunut ingerlatsinissaminut.

1) Timmisartunut miffarfiit pillugit Danmarkimut isumaqatigiisummut ilaavoq Greenland Businessip aningaasaliiffiqeqassasoq. Tassunga atatillugu pitsaalluinnassagaluarpooq milliuunerpassuit ilaat atorneqartuuppata siuarsaasinnaasumik sullivimmik pilersitsinissamut, uangut tamatta pisuussutitsinnik pilerisaarisinnaasumik. Sullivik suliamut tulluurtunik piginnaaneqassaaq - aamma periarfissaqartinneqassaaq suliainik tamakkiisumik isumaginninnissaminut. Amerlasuutigummi iluaqutaaneq ajorpoq takutitsinernut "puttutillatsiartarneq". Tuniniaaneq ingerlaavartumik pissaaq aamma malitseqartinneqartussaavoq. Tamatumanilu pisariaqarpoq niuerfinni najuuttuarnissaq periarfissat pinngorarfianni. Tupinnanngitsumik naalakkersuisoqarfiit sumiiffinni najuuttuaannarsinnaaneq ajorput pisortat isumagisassaasa pingaarnert pisariaqartimassuk sulianik ingerlatsiuartoqarnissaa.

2) Aappaatut naapertuutinngilaq Namminersorlutik Oqartussat "aatsitassanik nioqquteqartarlutillu akuersissutinik agguaassisarnerat peqataanillu nakkutilliisuusarlugu ilumut aatsitassarsiorfik isumaqatigiisutit naapertorlugit suliassaminik ingerlatsinersoq. Tuniniaanertaa namminersortunut



tunniukkaanni taava suliat avissaartinneqassapput ersarinnerulersillugu kikkut sunut akisussaansut.

3) Ukiorpanngortuni takureerparput aatsitassarsiorfiit arlallit misissueqqaarnissaminnut akuersisummik tunineqartartut taakkuli akornanni ikittuaqqat paaanissamut akuersisummik tunineqartarput, taannalu akuersisutaavoq kingulleq, aallartilnginnermi. Demokraatini nassuaaterpassuarnik tusartarnikuuvugut suut taamaattoqarnerseq, ataaserli aatsitassarsiorfinnit taaneqakkajuttoq tassaavoq, Namminersorlutik Oqartussat niuernerluppallaarnerat. Ilumut taamaattoqarnerseq taamaattoqannginnerlorluunniit Demokraatini nalilissanngilarput, kisiannili taannaavoq aatsitassarsiorfippassuit misigisarsimasaat. Tamannalu pingaarnersaavoq. Tassani Greenland Business imaluunniit alla namminersortoq aatsitassarsiorlutik aamma Namminersorlutik Oqartussani akisussaaffimmik tigummissup akoranni suleqatigiisitsiniartuusinnaagaluarpoq - taamaasiornikkullu isumaqatigiinngissutinik ikilisaalluni.

4) Pisortaqaqfinni oqartussaaffiit pilersinneqarnikuupput naleqqussassaammaata aqutsissammatalu taamaattumik sullivittut namminersortutulli eqqarsaatigivallaarneq ajorpaat ingerlatatik sinneqartooruteqassansut. Paarlattuanik ilungersuutigineqartarpoq oqartussaaffiit missingersuutaasa annerpaanngortinneqarnissaaq aamma qularnanngilaq siuarsarniarneqartassasut oqartussaaffinni sulisut pissanganartutut pilerinartutullu isigisaat, soorlu suliat angalanertallit aamma atorfirmi qaffakkiartornissamut periarfissaqartitsisut attaviit. Takusinnaavarpummi ukiuni taamannani aatsitassarsiornerup siuarsarneqarnissaanut aatsitassanillu nioqquteqarnissamut atugassanut aningaasaliissutigisartakkatsinnut tunngatillugu Namminersorlutik Oqartussanit tusanngisaannarnikuuarput tapiissutit ikilisartariaqarigut, taamaallaat paarlattuanik pisoqartarnikummat. Amerlanerusunik aningaasaliisartussaanikuuvugut, naak isaatitsissutissat - tunngaviusumik - ersinngikkaluartut. Eqqarsarnanngitsuunngilaq - tamannalu Inatsisartuni eqqarsarluarnerunissamut kajumilersitsisariaqaraluarpoq.

5) Namminersorlutik Oqartussat pilersaarineramik ingerlatsisarnert namminersortunut tunniuttuugutsigu taava Namminersorlutik Oqartussat nakkutiginerusinnaalissagaluarpaat aningaasaliissutit pitsaanerpaamik atorineqartalernissaat. Namminersorlutik Oqartussammi sulianik pissanganartunik ingerlataarukkunit, soqutiginerulissagaluarpaat aningaasalt namminersortunut aqutassanngortitamik naleqarnerulersinnissaat. Namminersorlutillu ingerlatsisut ukiumiit ukiumut aningaasaliissutaasartut aatsitassarsiornermut isumaqatigiisutinik pisariaqartinneqartunik taarsertanngippatigit, taava Namminersorlutik Oqartussat (isumatusaarunik) suliamik ingerlatsisussamik allamik nassaartariaqartassapput - imaluunniit ingerlatat millisarlugit.

Inatsisartuni partit tamarmik isumaqatigiisutigaaat siunissami siuariartitsisussat tassaasut tamatta pisuussutigut. Aamma Ataatsimiittarfimmi maani oqallinnerit malinnaavigigaanni taamatullu piffissap ingerlanerani § 37 naapertorlugu apeqqutigineqartartorpassuit taava Demokraatini neriuppugut, Inatsisartut suleqataajumassasut allanngortitsinissamut, tamatta pigisatta aatsitassat pigisatta iluini periarfissat piviusunngortissinnaajumallugit.



Demokraatini isumarput ersarippoq: Atorfilittagut niuertuusaartissinnaangilagut. Namminersorlutik suliffiutillit tamakkununga pikkorinnerujussuupput. Misissoriartigu namminersorlutik oqartussat suliffiutaat Greenland Business tamatumanga inuiaqatigiinnut pingaaruteqarluinnartumik pilerisaarinermik tigusinissaminut piukkunnaateqarnersoq. Taamaangippat taava allamik nassaarniartariaqassaagut.

Qanorluunniit pisoqassagualarpat isumaqarpunga pingaaruteqartoq uangut maani Inatsisartuni qulequtaq oqallisigilluassagipput taamaattumik tamanna tunngavigalugu Naalakkersuisut partiillu sinnerisa saqqummiussassaasa tusarnissaannut qilanaarpunga.

Taamatut oqaaseqarluta kissaatigaarput kusanartumik isumatuumillu oqallittoqarumaartoq.